

Utoqqaat pillugit Siunnersuisooqatigiit aamma Suliffeqarnermut Isumaginninnermullu Ataatsimiititap ataatsimeeqatigiinneranniit imaqarniliaq

*Marlunngorneq ulloq 19. novembari 2024, nal. 10:00.
Sumi: Kommunip allaffiani Kommunalbestyrelsip ataatsimiittarfiani*

Ataatsimeeqataasut ukuupput:

Utoqqaat pillugit siunnersuisooqatigiinniit

Birte Nielsen, siulittaasoq
Kaj Kleist, siulittaasup tullia
Kirsten Holm, Ilaasortaq
Jakob Thorsen, Ilaasortaq
Daniel Blytmann, Ilaasortaq

Peqataasinnaanatik nalunaartut: Peter Petersen, sinniisoq

Suliffeqarnermut Isumaginninnermullu Ataatsimiititaq

Inge Olsvig Brandt, siulittaasoq
Lone Rosengren Pedersen, siulittaasup tullia
Dorthe-Marie Mogensen-Fontain, Ilaasortaq

Peqataasinnaanatik nalunaartut:

Poul Petersen, Ilaasortaq
Mala Høy-Kuko, Ilaasortaq

Suliffeqarnermut Isumaginninnermullu Ingerlatsivik

Ejner Grønvold, Suliffeqarnermut Isumaginninnermullu pisortaq
Karen Lund Mølgaard, utoqqarnut suliasaqaqarfinni fagcheft
Naja Anelouise Heilmann, allatsi
Suliffeqarnermut Isumaginninnermullu Ingerlatsivimmi Lise Buchardt, Stabscheft
René Kvist, Isumaginninnermi Kiffartuussivimmi Allaffimmi pisortaq
Margrethe Najaaraq Kleist, Isumaginninnermi Kiffartuussiviup ataani pensionisiant
immikkoortortami aqutsisoq

Imaqarniliaq

1. Tikilluaqqusineq

Suliffeqarnermut Isumaginninnermullu ataatsimiititami siulittaasoq Kommuneqarfik Sermersuumi Utoqqaat pillugit Siunnersuisooqatigiit aamma Suliffeqarnermut Isumaginninnermullu ataatsimiititap akornanni ukiumoortumik ataatsimiinnermut peqataasunut tikilluaqqusivoq.

Peqataasut tamarmik imminnut ilisaritipput. Tulliatut Isumaginninnermut Suliffeqarnermullu Ataatsimiititaliami siulittaasup Utoqqaat pillugit Siunnersuisooqatigiivisa siulittaasuannut ullormut oqaluuserisassat saqqummiuteqqullugit oqaaseqaqqusivoq.

2. Utoqqaat pillugit Siunnersuisooqatigiit malinnaaffiginninnerannik siunnersuutaannillu misissuineq

Utoqqaat pillugit Siunnersuisooqatigiit siulittaasuata aallarniutigalugu oqaatigaa siunnersuisooqatigiit sinnerlugit qujalluni naapeqatigiinneq piviusunngoqqimmat. Siulittaasup eqqaavaa, kingullermik ataatsimiititamik ataatsimeeqatiginninneq pisoq ulloq 16. januaari 2024. Tamatuma kingorna siulittaasup siunnersuisooqatigiit suliaasa killiffiat ataatsimiititamik ukiumoortumik ataatsimeeqateqarnermi eqikkarpa.

Utoqqaat pillugit Siunnersuisooqatigiit siunnersuisooqatigiinnit siunnersuutit, peqqussutit aamma apeqqutit siulittaasuannit saqqummiunneqarput. Ilanngussani paasissutissat takuneqarsinnaapput.

Ilanngussat

1. Utoqqaat pillugit Siunnersuisooqatigiit ataatsimiititamik ataatsimeeqateqarnerannut ulloq 19 novembri 2024 oqaluuserisassat.
2. Ulloq 31. oktobari 2024-mi oqaluuserisassamut ilassut

Siusinnerusukkut siunnersuutitut malinnaaffiginninneq

Ataatsimiinnermi Utoqqaat pillugit Siunnersuisooqatigiit oqaluuserisassat ataatsimiinnermi ulloq 16. januaari 2024-mi saqqummiunneqartut killiffi pillugit apeqqutigineqarput. Utoqqaat pillugit Siunnersuisooqatigiit siunnersuutit nassiunneqartut ukuninnga qulequtallit qanoq ingerlanersut paasisaqarusupput.

1. Kommuneqarfik Sermersuumi utoqqarnut inissiat pitsaannerusut
2. Suliassanik avammut suliakkiisarneq
3. Utoqqaat isumassorneqarnerinut assaat amerlanerit

1. Utoqqarnut inissianik pitsanngorsaanissamut siunnersuut

Utoqqaat pillugit Siunnersuisooqatigiinni siulittaasumit siunnersuisooqatigiit siunnersuutaat saqqummiunneqarpoq, tassani Kommuneqarfik Sermersuumi utoqqarnut ineqarnermut atugassarititaasut pitsanngorsarneqarnissaannut pisariaqartitsineq ersarissarneqarpoq. Utoqqaat pillugit Siunnersuisooqatigiinnit siunnersuutigineqarpoq pisortatigoortumik

siunnersuusiortoqassasoq, Namminersorlutik Oqartussanut nassiunneqartussamik. Siunnersuut Namminersorlutik Oqartussat inissiaataannik iluarsartuussinnermut atatillugu utoqqarnut inunnnullu innarluutilinnut naleqqussakkanik inissianik amerlanerusunik qulakkeerinninnissamut kajumissaarummik imaqassaaq.

Utoqqaat pillugit Siunnersuisooqatigiinni siulittaasumit inissiat pisoqqat inissiallu naqqaniittut elevatoraqanngitsumik sanaartorneqarnikut utoqqarnillu amerlasuunik najugaqarfigineqartut nutarterneqarnissaannut pisariaqartitsineq oqaluuseriniarlugu kommunimit inissiaatileqatigiiffiit Iserit A/S aamma INI A/S attavigineqarnissaat innersuussutigineqarpoq.

2. Suliassanik suliariumannittussarsiuussineq

Utoqqaat pillugit Siunnersuisooqatigiinni siulittaasumit siunnersuisooqatigiit siunnersuutaat saqqummiunneqarpoq, taanna utoqqaat illuini najugaqartunik paaqqutarinninnermut pitsaanerusunik najoqqutassaqaarnissamik siunertaqarpoq. Siunnersuut eqqiaanermik errortassat allallu ingerlatsinermi suliassat avataanut suliariumannittussarsiuunneqarnissaannik imaqarpoq. Suliassat avataanut suliakkiutigisalerneqatigit kommuni ingerlatsinermik annertuumik angusaqarsinnaalissaaq nukissallu allamut atorneqarsinnaalissallutik taamaasillutik sulisut paaqqutarinnittut pingaarnertut suliassaminnut - najugaqartunut paaqqutarinninnermut isumassuinnermullu - piffissaqarnerulissapput periarfissaqarnerulissallutillu.

3. Utoqqarnik paaqqutarinninnermi assaat kissalaartut amerlanerit qulakkeerneqarnissaannut siunnersuut

Taakkua saniatigit Utoqqaat pillugit Siunnersuisooqatigiit siunnersuutigaat, piffissani sulisussaaleqiffinni, pingaartumik sulinngiffeqarfiup nalaani akissarsiffinnilu paaqqutarinninnermi sulisut aalajangersimasut qasuersaartikkumallugit aamma patajaatsumik paaqqutarinninnissaq qulakkeermallugu pisariaqartitsinikkut asiamiut tamaani najugallit atorfinitsinneqartassasut. Sulisussaaleqineq ingerlaannassappat utoqqarnik paaqqutarinninnermi naammattunik sulisoqarnissaq qulakkeermallugu aaqqiissutip ataavartumik aaqqiissutaanissaa eqqarsaatigineqarsinnaavoq.

Ataatsimiititami siulittaasumit akissuteqaat

Ataatsimiititami siulittaasup akissutigaa, utoqqarnut inissiat pitsaanerusut aamma assaat kissalaartut amerlanerusut pillugit saqqummiunneqartut eqqumaffigineqartut aamma politikkikkut suliniuteqarnermikkut sulissutigigaat. Unammilligassat taakkua iliuuseqarfiginiarlugit suliniutit aallartinneqarsimasut assigiinngitsut pillugit oqaluttuarpoq, ilaatigullu suliniutitut ingerlalluarsimasutut assersuutigalugu peqqinnissaqarfimmik suleqatigiinnissamut isumaqatigiissut eqqaavaa. Nassuiaatigaa, Paamiuni utoqqaat illuata peqqinnissaqarfik suleqatiginissaanik isumaqatigiissuteqartoq, utoqqarnik paaqqutarinninnermi najukkami nukissat qanoq pitsaanerpaamik atorneqarsinnaaneri eqqarsaatigalugit. Peqqinnissaqarfiup aamma Paamiuni utoqqaat illuata akornanni oqaloqatigiinneq aallartinneqarpoq, tassani suleqatigiilluni suliassat ataatsimoorullugit suliarineqarlutik. Taakkua saniatigit politikkikkut anguniakkani eqqarsaataavoq Tasiilami utoqqaat illuani assingusumik aaqqiissuussinissaq.

Utoqqarnut inissianik pitsaannerusunik aamma utoqqarnik paaqqutarinninnermi assannik amerlanerusunik pissarsinissamik qulakkeerinissamut annertunerusumik sulinermik pisariaqartitsiffiusumik sulii unammilligassaqartoq ilanngullugu oqaatigaa. Atugassarititaasut pitsanngorsarnissaannut iliuuseqartoqartarnissaanut pingaartittuaannarlugu erseqqissaatigaa.

Pisortamit akissuteqaat

Suliffeqarnermut Isumaginninnermullu pisortap ilisimatitsissutigaa, Naalakkersuisut utoqqarnut periusissiaasa suliarineqarnerani peqataasimalluni. Tassunga atatillugu utoqqarnut inissiat eqqartorneqarput oqaatigivaalu utoqqarnut inatsisissami utoqqarnut najugaqatigiiffiornissamut periarfissat pillugit aalajangersakkat ilaasut. Kommuneqarfik Sermersuumi taaguut "utoqqarnut ataatsimoorfiit" atorussukkaluarparput oqaaseq "utoqqarnut najugaqatigiiffiit" Ittoqqortoormiini Qeqertarsuatsiaanilu neqeroorutini pioreersuni atorneqarnera pissutigalugu. Utoqqarnut inatsit massakkut Inatsisartuni siullermeerneqarpoq, inaarutaasumillu oqaluuserineqareerpat "utoqqarnut ataatsimoorfinnut" tunngasuni periarfissanik nutaanik ammaassinissaa naatsorsuutigineqarpoq. Pisortap naggasiutigalugu oqaatigaa qanoq piviusunngortinneqassanera takunissaa pissanganartoq.

Ataatsimiititami ilaasortamit akissuteqaat

Dorthe-Marie Mogensen-Fontain, Suliffeqarnermut Isumaginninnermullu Ataatsimiititami ilaasortaq utoqqarnik suliaasaqarfimmi suliniutinik arlalinnik erseqqissaavoq ilisimatitsissutigalugulu kommunalbestyrelsimit pilersaarutigineqartoq Kommuneqarfik Sermersuumi utoqqarnik suliaasaqarfik ukkataralugu immikkut sammisaqarnissaq. Immikkut sammisaqarneq Kommuneqarfik Sermersuumi utoqqarnik suliaasaqarfik tamakkerlugu tamakkiisumik paasisaqarfiussaaq, tassunga ilanngullugu ineqarnermut atugassarititaasut, taakkua pingaarnersiuiinissamut aamma siunissami suliniuteqarfigisassat pillugit oqallinnissamut tunngavilersuutaassapput.

Utoqqarnik suliaasaqarfimmi fagchefimit akissuteqaat

Utoqqarnik suliaasaqarfimmi fagchefimit Kommuneqarfik Sermersuumi utoqqarnik suliaasaqarfimmi killiffik pillugu ilisimatitsissutigineqarpoq, tassunga ilanngullugit aningaasaliissutit, sulisunik pikkorissaanermut ilinniartitsinerillu pillugit suliniutit aallartinneqartut, isumaginninnermi teknologiinik, digitalimik angerlarsimaffinni sungiusarnermik assigisaannillu atuutsitsilerneq.

Suliffeqarnermut Isumaginninnermullu sullissivimmit fagchefimit akissuteqaat

Suliffeqarnermut Isumaginninnermullu sullissivimmit fagchefimit utoqqalinersiat annaanngikkaluarlugit sulisinnaanermut periarfissat saqqummiunneqarput. Saqqummiineq Inatsisartut inatsisaat nr. 42, 14. septembri 2023-meersumik aamma 2024-mut akit allattorsimaffiinik tunngaveqarpoq. Kommunip nittartagaani quppernermi Soraarnerussutisiat iserfigigaanni utoqqalinersialittut utoqqalinersiat ikinnerulersinngikkaluarlugit qanoq annertutigisumik aningaasarsiortoqartigisinnaanersoq paasisaqarfigineqarsinnaavoq. Paasisutissat kalaallisut qallunaatullu pissarsiarineqarsinnaapput aamma paasiuminartumik oqaasertalersugaapput.

Ikiorneqassagaanni paasisaqarnerorusukkaannilu pension@sermersooq.gl attavigineqarsinnaavoq imaluunniit kommunip nittartagaani sukumiinerusut takuneqarsinnaapput.

Utoqqaat pillugit Siunnersuisooqatigiit siulittaasuannit siunnersuutigineqarpoq paasissutissat aamma tigussaasunngortinneqarsinnaasut taamaasillutik utoqqarnit internetseqanngitsunit pissarsiarineqarsinnaassammata.

3. Taasariaqartut allat

Ataatsimiititami siulittaasumit siunnersuutigineqarpoq, Utoqqaat pillugit Siunnersuisooqatigiit oqaloqatiginerat nangingeqassasoq, ataatsimiinnerup nalaani immikkoortut marluk kisimik piffissaqarfigineqarmata. Piffissap annikitsuinnaanera ajuusaarutigivaa, siunnersuutigalugulu siunissami ataatsimiittarnissat pilersaarusiorneqaraangata sivilisunerusumik oqallinnissamut piffissaqartarnissaa. Aamma siunnersuutigivaa, Utoqqaat pillugit Siunnersuisooqatigiinnut allatsiat namminerminut Utoqqaallu pillugit Siunnersuisooqatigiit siulittaasuannut saaffiginnissuteqartassasoq, kaffisoqatigiinnissaq aqqissuullugu, tassani namminneq eqqartugassanik sukumiinerusumik eqqartueqatigiittarniassagamik.

Ataatsimiititap siulittaasuannit erseqqissarneqarpoq, siunnersuisooqatigiinnik suleqateqarnerup qanoq pingaaruteqassusia, minnerunngitsumik paasisaqaannarnissaq pinnagu aammali ataatsimiititap suliai pitsaanerulersinneqarnissaat pillugu. Utoqqaat pillugit Siunnersuisooqatigiinnut qujassuteqarpoq, piumassutsiminnik sulinerat tunniusimanerallu pillugit, erseqqissarlugulu isummanik nalitoqisunik siunnersuisooqatigiit tunniussaqaartuarnarat ataatsimiititamiit ataqqineqartuaannartoq.

Utoqqaat pillugit Siunnersuisooqatigiit siulittaasuut aamma qujassuteqarpoq ullormut oqaluuserisassanik saqqummiinissamut periarfissinneqarneq pillugu, aamma ataatsimiititaq immikkoortut saqqummiunneqartut assigiinngitsut pillugit eqqartueqatigiinnissamik kissaateqarmat. Ilanngullugu ataatsimiititap siulittaasuannik kaffisoqateqarnissani qilanaaralugu oqaatigivaa.

Ilanngussaq 1 - Ullormut oqaluuserisassat utoqqaat pillugit siunnersuisooqatigiit aamma ataatsimiititap ulloq 19. novembari 2024-mi ataatsimiinnissaani

Nuuk ulloq 31. oktobari 2024

- qallunaartoortaa.

Kommuneqarfik Sermersuumi Utoqqaat pillugit Siunnersuisooqatigiinnit SIA-mut ulloq 19. novembari 2024-mi ataatsimiinnermi siunnersuutit/peqqussutit apeqquutillu.

Apeqquutit:

Utoqqaat pillugit Siunnersuisooqatigiit ulloq 16. januaari 2024-mi ataatsimiinnermi saqummiussaasa sumut killinnerat apeqqutigerusupparput, tassaasut:

1. "Kommuneqarfik Sermersuumi kommunalbestyrelse nunatsinni utoqqaat ineqarneranni ajornerpaanik ineqarnerat pillugu pissutsit piviusut iliuuseqarfigissagaat piaartumillu kommunimi inissiaareersuni utoqqarnut inissiat iluarsiviginissaannut iliuuseqassasoq kiisalu suliniutitigut nutaakkut utoqqarnut ataatsimut najugaqarfiit aqqutigalugit iliuuseqartoqassasoq."

2. "Utoqqaat isumassorneqarneranni assaat amerlanerusut"

Utoqqaat pillugit Siunnersuisooqatigiinnit paaserusunneqarpoq siunnersuutit nassiunneqartut qanoq ingerlanersut?

1-mut. Immikkoortumut Utoqqarnut inissiat pillugit ilassutitut imatut oqaaseqassaagut:

Namminersorlutik Oqartussat inissiaatiminnik annertuumik iluarsartuussinissaminnut pilersaarutaannut atatillugu inissianik inunnut innarluutilinnut utoqqarnullu naleqquttunik pilersitsinissartik pilersaarutigivaat. Massakkut utoqqaat pitsorluttut kaassuartakkanillu issiavillit amerlasuut inissiani allerni najugaqarput, nunamut tullerniittuni, (taakku naqqani inissiatut taaneqartarput) inissiallu taakku inissiani ajornerpaanut ilaapput, inissiattoqqani allerpaaniinnertik pissutigalugu (1950-70-meersut). Nittaalarujussuuartillugu aqqutigineqarsinnaasut ajorluinnartarput. Inissiat ussiitsuupput nillerlutik (naammattumik oqorsagaanngillat igalaavilu ussiitsuullutik) taakkunanngalu amerlasuut napparsimalersitsisinnaasumik oqoqarput. Taakku ullutsinnut naleqqukkunnaarput.

Innersuussutigivarput Namminersorlutik Oqartussanut nassiussassamik siunnersuusiortoqassasoq.

2-mut "assaat kissalaartut amerlanerusut" siunnersuut imatut ilassutissaqarfigaarput:

Qanoq "utoqqarnik paaqqutarinninnermi assaat kissalaartut" amerlanerusut anguneqarsinnaappat? Sulisussaaleqiuarneq qanoq qaangerneqarsinnaava?

Siunnersuutigerusupparput, utoqqaat angerlarsimaffiinik/utoqqaat illuinik ingerlatsineri suliasat soorlu eqqiaaneq, errorsineq il.il. suliariumannittussarsiuussineq atorineqarsinnaasoq taamaasillutik sulisut najugaqartunik ukkassinerusinnaassapput. Suliariumannittussarsiuussinikkut suliasallu

"illup iluaniit avammut" nuunneqarnerisiguttaaq ingerlatsinermi annertuumik angusaqartoqarsinnaavoq aqutsisunullu periarfissaqarnerulersitsisinnaalluni.

Taakkua saniatigut Asiamiut maani najugaqartut ammaffigaavut, taakkua piffissap ilaani pinartoqartillugulu, najukkamiit sulilersitsinissamik ajornartoofinni sulisunut ikiuussinnaapput aamma/imaluunniit ataavartumik aaqqiissutissatut. – Piffissap ilaani sulisussaaleqisoqartarpoq (sulinngiffeqarnermi kiisalu akissarsiffinni), taakkunani najugaqartunik paaqqutarinninneq ajorseriartarpoq aamma sulisut aalaakkaasut tatisimaneqarnerulertarput suleqatit sulinngitsut suliassaannik suliagartarneq pissutigalugu. Taakkua tatisimaneqarnerat isiginnaaginnarsinnaanngilarput akuersaaginnarsinnaanagulu pissutigalugu takkutinngitsoornermi angerlarsimaffinni utoqqarnik paaqqutarinninnerup naapertuutinngitsumik ajorseriarnera avaqqunneqarsinnaanngimmat.

Imm. 2. Ukioq manna septembarimi Utoqqaat Illuani Ippiarsummilu pulaarnitsinni utoqqarnut atugassarititaasut annertunerusumik ilisimasaqarfigilerpagut paasissutissallu taakkua aallaavigalugit siunnersuuteqarusuppugut:

a. Najugaqartut internetsimut attaveqarsinnaanerannut periarfissaq pitsaannerusariaqaralarpoq.

2a-mut. Utoqqaat ikiorneqarnissamik pisariaqartitsileraangamik utoqqaat illuanut nuukkaangamik utoqqalinersiaat ikileriarujussuutarput aamma internetsimut kanalillu akeqanngitsut saniatigut TV-kanalinut attavilerusukkunik namminneq immikkut taakkununga 100%-imik akiliisarput.

Utoqqaat - immaqa ataatsimut - akikinnerusumik internetseqalersinnaanersut misissorneqartariaqaralarpoq. Aaqqiissutissatut Tusass aqutigalugu misissorneqarsinnaavoq Tusass utoqqaat illuani najugalinnut akikinnerusumik internetsimut attaviliisinnaanersaq. Utoqqaat atuisut amerligaluttuinnartussaapput.

b) Puiguttortunik suliassaqarfimmi suliniutit ineriartornermut malinnaasariaqaralarput.

2b-mut. Utoqqaat illuani pulaarnitsinni sulisoq puiguttortunik suliassaqarfimmut immikkut ilisimasalik peqataavoq.

Paasissutissiissutigaa siunissami inuit puiguttortut amerlanerulissasut aamma ineriartorneq taanna suliassaqarfinni tamani malinnaaffigineqarnissaa pisariaqartoq, ass:

- a. Inunnut puiguttortunut amerlanerusunik inissialiortoqarnissaa aamma
- b. Inuit puiguttortut qanigisaasut asartik puiguttortunngorsimasooq paasigaangamikku aliasukkajuttartut tupaqqakkajuttartullu. Qanigisaasunut puiguttortunngorneq nappaat pillugu paasissutissat annertunerusut paasinninnerlu annertunerusoq pisariaqartoq. Pingajuattullu:
- c. Peqqinnissaqarfimmut saaffiginnittoqassasooq inuit puiguttortunngortut sukanerusumik immikkut nakorsamiit paasineqartalernissaat kissaatigalugu. Amerlasuut avataaniit immikkut nakorsaqaalernissaanut sivisuumik utaqqisarput. Sivisuumik utaqqinerup kingunerisarpaa napparsimasup piffissaq eqqorlugu ikiorneqannginnera siusissukkullu suussusersiffigineqarnermiit sanilliullugu angerlarsimaffimmiinnera pisariaqartumiik sivisunerusarpoq.

Immikkoortoq 3. Ippiarsummut Illutaata atorneqarnera (amerlassutsit m2 atorneqarneranut naleqqiullugu) ilisimasalimmit nalilersorneqarnissaa innersuussutigarpur.

2c-mut tunngatillugu Ippiarsummut pulaarnitsinni maluginiarparput allaffippassuaqartoq, ataatsimiittarfiit pequusiviillu. Ilisimatinneqarpuguttaaq utoqqaat illoqarfitsinni paaqqutarineqarnissamik paarineqarnissamillu pisariaqartitsisut amerlasut. Taakkua saniatigut kommunimi inoqarfinniit allaniit inuit tikittarput sanamiinnerup kingorna sukisaarsaarfimmik pisariaqartitsisut, illoqarfigisaminnilu allamik periarfissaqannginnamik illoqarfimmi utoqqaat illuinut inissinneqartartut peqqissillutik angerlarnissamik tungaannut. Illoqarfimmi pisariaqartitsisut inissaat atortarpaat. Ilaatigut taakkua pissutigalugit utoqqaat illuini ineeqqat/siniffiit amerlanerusut pisariaqartinneqarput. Allanguilaarnikkut immaqa pitsaanerusumik inissamik pioreersumik atuisoqarsinnaagaluarpoq amerlanerusunik siniffinnik/ineeqqanik pilersitsisoqarluni. Taamaattumik tamanna kissaatigineqarpoq.

Imm. 3. Kommunimi utoqqaat atugaannik misissuinerup inerneru uagutsinnut saqqummiunneqarput.

(Naatsorsuutigaa inernerit SIA-mut saqqummiunneqarsimassasut).

Misissuineru inerniliussaasoq ilaatigut tassaavoq:

a. Utoqqaat kiserliortut misigikkajuttartut.

Tassunga tunngatillugu "massakkut" aaqqiissutigineqarsinnaasunik ujartuivugut, soorlu:

a. Illoqarfimmi utoqqaat Pilutamut (peqatigiiffiup illua) angallanneqarnissaannut periarfissat pitsaanerusut

Tassani eqqarsaatigivarpur illoqarfiup bussiunik angallanneqarnissamut periarfissat pitsaanerusut. (Nuup Bussiini siulersuisunut saaffiginnittoqarsinnaavoq)

b. Utoqqarnut bussinik pissarsineq (pitsorluttunut bussit piffissami sivisuumi uninngapput – aali normupladeqarlutik) aamma

Piffissani ungasinnerusumi:

c. Utoqqaat avammut attaveqarsinnaanerannut periarfissat pitsaanerusut.

Uani sianerfissaq eqqarsaatigineqarpoq utoqqaat kiserliortut sianerfigisinnaasaat (Tusaanngamut assingusumik). Taakkua saniatigut nalilernerarpoq illoqarfimmi utoqqarnut ataatsimoorfissat allat pisariaqartinneqartut, assersuutigalugu Qinngutsinni, tassani assassukkatit nassarsinnaallugit sumiiffimmilu allanik peqateqarsinnaallutik.

d. Utoqqaat utoqqaat illuiniittut pinngortitamiinnerunissaq pisariaqartippaat. – Tamanna peqqinnerulersitsisarpoq.

e. Utoqqarnik misissuineru inerniliussami allassimasoq aallaavigalugu utoqqaat pisariaqartitaat sumiiffimmiit sumiiffimmut ersarinnerunissaat kissaatigineqarpoq.

Inerniliussaataatsimut inerniliussatut suliaavoq nalunngilarpullu illoqarfissuarmi atugassarititaasut inoqarfinnut mikinerusunut sanilliullugit assigiinngitsorujussuusut. Nalunngilarput utoqqaat tusaaneqartut misigissasut kissaataat tusaagutsigit.

Taamaattumik annertunerusumik agguataarinissamut aningaasanik/aningaasaliissutini kissaateqarpugut.

Inussiarnersumik

Birte Nielsen, siulittaasoq

Ilanngussaq 2 - Ullormut oqaluuserisanut 31. oktobari 2024-meersunut ilassut.

Nuuk ulloq 10. novembari 2024

Ulloq 19. novemberi 2024-mi Utoqqaat pillugit Siunnersuisooqatigiit SIA ataatsimeeqatigineranut oqaluuserisassanngortitanut apeqqutit/inassuteqaatit/siunnersuutit.

Oqaluuserisanut 31. oktobari 2024-meersunut ilanngussani imm. 3:

Imm. 3C-mi Paamiuni utoqqaat bussiuqqarsinnaanissaat pillugu kissaatigineqarnera pineqarpoq.

2024-p aallartinnerani Paamiuni kommunalbestyrelsimut ilaasortap innuttaasut ilisimatippai, bussitaarnissamut ukioq manna missingersuutinit aningaasaliiffigineqartoq. Tassanngaannit massakkumut tassunga nutaarsiassaqaqanngilaq.

Taamaattorli qanittumi tusarparput Qaqortumi bussinik ingerlatsineq siulliullugu misissorneqaqqaarniarpoq.

Nalunngilarput utoqqaat Nuummi akeqanngitsumik bussertartut. Paamiuni utoqqaat kommunimi utoqqaat allat assigalugit Paamiuni akeqanngitsumik bussernissaminut naatsorsuutigisinnaavaat?

Aammattaaq paaserusupparput taanna bussi qaqugu pisiarineqarnissaanut naatsorsuutigissanerippat? – tassami Paamiuni utoqqaat utoqqarnut illumut sammisassaqaqtitsivimmut aamma angerlarsimaffiinngaanniit ungasinnerusunut allanut siumut utimullu biiliunneqartarnissaminut akulikitsumik pisariaqaqtitsisarput.

Imm. 4-tut uku apeqqutiginiarpavut:

Siornatigut pensionisiaqartut isaruarsiniaraangamik tapiissuserneqartarnikuugaluarput. Isarusserisup isarusat pisiarineqarumasut qanoq akeqarneri pillugit oqaluttuussisarpoq, kingornatigullu utoqqaap kommunimut tapiissuteqarnissaminut qinnutigisinnaallugu.

Kingullertigut Paamiuni utoqqaat pillugit siunnersuisooqatigiinni ilaasortap itigartitsisoqartoq paasivaa. Tapiissuteqarnermik aaqqissuussaq suli atuunnersoq paaserusupparput. – kissaatigalugulu najoqqutassiat ersarissut eqqortullu utoqqarnut tunniunneqassasut.

In.in.

Birte Nielsen, siulittaasoq